

吳興備志

十二



吳興備志卷之三十一

烏程董斯張遐周策編

詭徵第二十六之二

芮燁初任仁和尉長河堰有龍王廟每祭則有小蛇出或上香鑪或飲于杯往來者謹事之堰歲數壞人以爲龍所爲芮疲于脩築之役一日焚香設奠蛇果出鑪上芮端笏數之曰有功于民者乃得祀龍廟食于此未嘗有功而歲數壞堰勞民之力爲罪多矣無功有罪于國法當殺卽舉笏斬之應手碎是夕宿于近地疾風甚雨大木盡拔土人大恐而芮處之自若後卒爲名臣云

齊

東野語

宋周階字升卿泰州人寓居湖州四安鎮時秦楚材守宣城檄攝南陵尉以病疫告歸夢至冥司一吏引階問曰何得酷嗜牛肉叱令鞭背數卒倅拽以去階回顧乞命且曰自今以往不惟不敢食當與闔門共戒主者意動解乃得歸汗流浹體疾頓愈

西吳里語

胡楷世行嘗言先世由徽來雪買房屋廣化寺側脩理夾壁得故攢堂一屍僵臥如生觸之則輒應手灰滅遂白有司遷瘞之三年後遂舉一子

三柳軒雜記

弁山隆報寺旣無子遺偶像一切暴露風日淋灩或爲人徙去善神一軀仆地上丐者吳大爲和泥補葺且昇施園證寺久之吳大受顧結屋墜梯折腰傷勢殊亟夢

神來云汝昔嘗救我我不敢忘授以乳香飲方其法用酒浸虎骨敗龜黃芪牛膝草薺續斷乳香七品覺而能悉記卽喚子買藥敬服之一旬而愈

夷堅志

太湖漁者陸氏子舉網得蟹如斗大以薺翦其網皆斷陸怒欲烹之其侶老于漁者曰不可吾聞龜蟹之殊類甚者必江湖之使也烹之不祥乃釋之蟹至水橫行里許方沒

陸肱蟹譜

湖州村民沈二八在園鋤菜畦有二阜隸持帖至呼之曰汝非沈二八乎曰然曰陰府追汝可同去卽執而枷縛沈曰去不敢辭敢問何罪曰汝坐用大斗量租米沈曰然則使者誤矣小人以種作爲生家無寸土元不識

斗斛面何由有此但相去數步閒有沈主管者于我同
排行其人乃豪家幹者素有此惡爲人積怨目前牆內
是其家也二阜遽推謝釋其縛俄頃沈蘇還舍爲妻子
道曩事且云吾今往二八主管宅親察消耗纔出門復
遇二阜已掄擲而去及其家則聞哭聲言主人暴死矣
是時淳熙十五年三月也

竝上

嗣秀王伯圭爲安僖卜宅兆銜哀走數百里惟烏程之
菁山最佳卜之而吉然念力不能致裴回其處一叟忽
前曰官豈姓趙而欲求葬地乎王矍然曰汝何以知之
叟曰嘗夢神告我矣指所卜之地以售今寢園是也

樓

鑰崇靖憲王行狀

湖州月河莫氏衣冠大族也祖塋在下峰之西南曰齊山古木千章巨竹萬挺一郡形勝無與比倫乾道二年正月僧菴中堂忽有大蟻聚焉往來營營不見其止未覺爲有異也明日視之蟻塹上蛀成大樹一株根幹壯實枝葉扶疏觀者靡不嗟賞謂圖畫之工有所不逮僧飾以朱闌護惜甚謹至今三十年間尙存也

稗史彙編

吳興周權異伯乾道五年知衢州西安縣招郡士沈延年爲館客邀至紫姑神每談未來事未嘗不驗尤善屬文清新敏捷出人意表周每餘暇必過而觀之嘗聞窗下鵲噪甚急周試扣曰鵲聲頗喜未審報何事卽書一絕句末聯云窗前啁啁緣何事萬里看君上豹關周笑

曰權乃區區一邑長大仙一何相奉過情耶周從監左
藏西庫擢守婺沈偕往周欲延鄉僧智勇住持小院白
仙曰此僧絕可人工琴善弈仙能爲作請疏否援筆立
書其警句云指下七絃彈徹古來之曲局中一著深明
向上之機詞旣藻麗且深測彈理通判方棗宴客就郡
借妓周適邀仙從容因求賦一詞仙乞題指瓶內一捻
紅牡丹令詠之又乞詞名及韻令作瑞鶴仙用捻字爲
韻意欲因險困之亦不思而就其語云靚嬌紅細捻是
西子當日留心千葉西都競栽接賞園林臺榭何妨日
涉輕羅慢褶費多少陽和調燮向來露浥芳包一點醉
紅潮頰雙靨姚黃國豔魏紫天香倚風羞怯雲鬢試插

引動狂蜂蝶況東君開宴賞心樂事莫惜獻酬頻疊看
相將紅藥翻階尙餘侍妾其他詩文非一皆可諷玩周
以紹熙甲寅爲福建安撫參議官

詩話類編

閩中一士人居華亭有趙通判者居烏程約士人爲館
客久未得往士人偶閒步至獄祠見一婦人緩行一僕
持一小青蓋且挈香合背子從其後徧詣殿廡拜而焚
香畢事而出士人隨之行數十步婦人回顧問士人何
姓士人告之因復問婦人姓氏則不荅笑以所持扇示
之上有書念七三字士人疑其娼家姓第但怪無書姓
者未及詳語婦人遽取僕所持銅絲香合以授士人卽
前行去復隨之一里許入一寺中人跡稠雜忽失婦人

所在後數日趙倅遣僕馬持書來迎正二十七日書也
士人異之既至書館每以所得香合愛玩常寘几閒一
婢嘗來書館視童稚輩每諦視香合酷似趙亡妻棺中
舊物入言之倅取驗視信然因問士人所從得初猶諱
之扣之再四乃備言曩日所遇倅問婦人服飾狀貌乃
其亡妻叢途寺中也悲惋久之卽議舉葬啟殯視棺側
有小竅僅容指云

睽車志

淳熙庚子夏四月湖州烏程岳祠啟黃籙醮會西殿鴟
吻有蛇蟠繞其上法師葉以十四日夜拜章言于眾曰
一二日必有風雷之變時連日晴明天宇澄廓纖雲不
飛眾以其言不驗至十六日暮夜濃雲鬱興須臾蔽空

迅雷風烈雨雹交下雹大如彈屋瓦爲碎眾皆凜然移時乃定靈壇供具幡旗之屬儼然如舊略無漂濡乙夜雲斂月明視鴟吻并與蛇皆失所在翌日訪郊外初無風雹之驚蓋是時飄擊之勢止數百步閒也

竝上

湖州武康監稅周光以職事被檄入府館于一寺之僧堂每夜常見聖僧像前鼠盜其供物果實之類入于像座之下一日乘闕于座下尋之則鼠乃聚故碎經紙爲窠內有新生鼠四枚皆無足宛轉啾啾然蓋毀經盜果之報也

竝上

康熙十二年宗室中有叔姪三人自臨安調選歸其所居同邑當四五月之交共買小舟經吳興過谿中一灘

日午風大作天色晦冥若有物執其柁卽時淪覆幸水淺得不溺死旣達岸茫不知爲計俄一籠漂至前視之則叔敕誥袍韉之屬雖遭淹浸略不汙溼叔甚喜二姪泣曰叔無所憂惱奈我等何繼又有一籠至二姪文書在焉日已暮投宿邨舍凌晨徒步而出見田父荷鋤治地望其倉皇愁窘問之告以故父曰何不往問趙法師可知底蘊且語其居處遂行訪問亦宗室素相善者趙歷叩曲折云彼處乃小小川瀆何能壞舟船必有異吾行制鬼神術當相爲考召立可見矣作法纔畢鬼物已盈家其爲首者蓋向所遇田父也趙責數之仍索舟中物一一皆在悉爲此鬼家屬服用若都城所謂冠珥首

飾婦女掩爲妝具趙怒罵曰汝旣溺人舟又竊取所齎
安得逃罪欲行繩治次對曰某忝爲當界土地前此數
日被城隍司公牒指名覆此舟諸物皆據牒交領惟三
人誥命乃書制非籍中所載物旋送還之矣牒尙存可
以驗視趙取而明之竟無以罪于是釋使去

廣輿異編

呂仲發顯謨宰安吉日縣圃有大杏一株十月間忽開
花四朵全是薔薇殊不類杏自是呂從劉棊甫樞密之
辟不逾年凡四遷秩亦花之瑞也

並上

楊纘繼翁大卿倅湖日七夕夜其侍姬田氏及使令數
人露坐至夜半忽有一鶴西來繼而有鶴千百從之皆
有仙人坐其背如畫圖所繪者彩霞絢粲數刻乃沒楊

卿時已寢姬急報起而視之尙見雲氣紛郁之狀癸辛雜識

淳熙閒烏鎮西利濟院有道人祝道誠者頗有行誼死之日見夢于鎮人黃巖縣縣丞顧元龍曰我當爲公之子但公無家眷于此吾故託生黃巖民項氏家元龍夢覺甚奇之翌日訪之民有項氏婦果于是夜產一男產婦將就褥時亦夢一神人謂曰所生者非汝子當爲顧縣丞嗣于是元龍遂收項氏子爲己子以其生于巖邑故名之曰巖及元龍任滿歸其徒又夢神謂曰爾師明日未時歸可至通河橋相候其徒如期而往遇元龍元龍因道其事巖生之日卽道誠之死期也巖後仕至禮

邵尙書

烏青志

淳熙中有錢三翁者衣衲茹素脅不沾席者五十年俗呼布衲翁時德清建阜安橋屬主其事一夕謂其徒曰翌朝有餽醬謹視之明日果有青坡村民獻醬二甕探之得銀二笏以充橋費人異其前知常摩娑橋曰此可過五百年寶慶丁亥秋震風淩雨民廬寺觀多壞此橋屹然中流片石不搖

齊東野語

長興縣有邸姬采桑次被虎銜入深谷中不傷之其虎就將蹲自旦至午姬告曰某之年邁莫有宿業否今困于此又不食乞大聖念之

呼虎爲大聖

虎遂伸一腳于

姬前看之有一竹籤在爪下姬又曰莫要去耶否掉尾

點頭似相感之狀。軀乃爲拔之。虎迅躍數四。卻銜之。舊所竝無損。至夜置一鹿于門首去。

襟光錄

長興環沈村。昔有一石鵝。自太湖浮游至大朴土地廟。爲人所擊斷之。

並上

太湖之閒。邨民耕耘之暇。多事網釣。以甘口腹。獨沈文寶家。全家好善用錢。買所獲之禽魚放焉。眾笑其癡。沈獨爲喜。後直疫。疾人有夢見疫鬼執旗一束。自相語曰。除沈家放生外。餘排門竝可插旗。其居民三百餘家皆染疾死者。過半。獨沈全家獲免。後享高壽而卒。

好生錄

吳潛吳淵居雪川。未第時。日侍其父讀書。食後。倘佯門外。有道人來訪問曰。先生有何術。道人曰。能墨戲。曰。得

非媒竹乎曰非可將小盃磨墨來爲君作一筆戲因欣然從之道人乃以帚蘸墨刷于壁間稍乾腰上出銅篋劃開引其伯仲來觀中有五色祥雲覆以寶殿屏上金裝狀元吳潛字隨揜而去後潛以大魁歷仕拜相淵參大政開制閩

宋狀元錄

王臞軒清舉到省道經建陽謁夢蓋竹廟夢至王者居有五百人列坐而虛其四臞軒未至有呼者曰官人位在此王旣坐舉首見席端一僧負氣怒甚左右曰此陳躋如尊者遂寤及廷唱大魁乃吳潛也

癸辛雜識

宋末長興人夏杞無子養金氏子爲子名世昌挈家華亭杞爲典押元初一再遷華亭尹因稅故第世昌居之

寢宋纏錦登年腐破上有金填三大字曰金世昌

錢岡

雲間通志

宋末丙子北師自蘇入杭道由湖州東遷有道人結茅岸旁備水飲以施行者化緣募鑄觀音銅像積久乃成相好端嚴晨夕奉事聞師至歎曰一死何恨所惜此像兵火不保耳夜夢大士告曰吾何所慮恐汝不免蓋汝前生殺人今來者正宿冤也明日有三騎過山其前二人衣紅後一人衣白者是已汝可迎之以請死無違也至期所見無異其人曰人皆避匿獨爾敢留執之至菴索其所積具以實告且曰吾若厚藏豈不爲性命計其人感悟遂釋之

並上